

仁祖大王實錄卷之十三

六月朔壬申

上幸魂宮參朔祭○全羅監司閔聖徵啓聞列邑旱乾之狀○

副護軍張顯光上疏告退

荅曰觀卿辭章心甚缺然卿意已決旱炎漸酷予

不敢強請明朝欲為相見卿須姑留以副予至意○以李明漢為同副承旨李

聖求為兵曹參知○夜西方東方良方有氣如火光○癸酉遠接使金瑬馳啓

曰兩使到安州招譯官等言曰聞爾國王迎詔勅時有天橋之禮路上各站例

有銀子印信冊子云譯官等荅曰賤譯等自前伺候詔使老爺多矣而未見如

此之禮云則兩使曰詔勅不可從城門而入自前有造作天橋之禮各站例有

應納銀子開錄呈進云俺等雖不可受爾國果有此事則當據實申稟而掩匿

不言必是爾等與地方官共為隱沒之計也譯官等反覆陳辨終不得解釋乃

曰天橋一款冉太監登到小邦要索銀錢巧做名目乃有造排天橋詔勅踰入

之說納銀簿冊亦是前後太監所創之弊今者二老爺臨莅下邦清名已播豈

以此等無理之說至溷清聽乎兩使相顧曰爾等姑退伺候俺當訪察云今此

詔使清約近古所罕而不意提起此言殊甚可愕臣於宴席反覆陳說云○

上引見副護軍張顯光顯光曰自上即位之後凡事皆已修舉而至於教化